

INUIT ATAQATIGIIT

INATSISARTUNI



Aasiaat 31.august 2016

Inatsisartut suleriaasianni § 37 naapertorlugu Naalakkersuisunut imaattunik apeqqute-qarpunga:

- 1. Immap naqqatigoortoq kapelersuaq qaqugu Aasiannut apuutissava atuutilissavalu?**
- 2. Nuummi Qaqortumilu kisimi 500 gb tikillugu atuisoqarsinnaavoq. Taannalu “taamaallaat” qaammammut 1099,-qarpoq. Illoqarfiit sinnerini annerni taamaallaat annerpaamik 50 gb-mik pisisoqarsinnaalluni. Taannalu akeqarpoq 1149,- qaammammut.**
 - a. Naalakkersuisut pilersaaruteqarnerpat Iluliarmiut, Aasiammiut, Sisimiormiut, Maniitsormiut, Paamiormiullu, Nuummiutuulli Qaqortormiusulli akiusup assinganik 500 gb tikillugu neqeroorfigineqarsinnaalersinnaanerannik? Taava qaqugu tamanna naatsersuutigineqarsinnaava?**
- 3. Upernavimmiut, Qaanaarmiut, Tasiilarmiut, Illoqqortoormiormiullu sukkanerusumik pitsaanerusumik, akikinnerusumillu internet-mut attaveqaateqalersinnaaneratt pillugu Naalakkersuisut qanoq pilersaaruteqarpat?**
- 4. Ilumoorpa aasaq manna Nuummi 15 gb-mik atuisut pinngitsaalillugit 50 gb-mut atuisunnngortinneqarsimanerat? Ukiullu marluk missaa matuma siornatut akiusumut, tassalu akisunerusumut uteqqittoqarsimaneranik unnerluutiginninneq ilumoortortaqarpa? Taamaattoqarsimappat sumik tamanna tunngaveqarpa?**

(Inatsisartuni ilaasortaq Peter Olsen, Inuit Ataqatigiit)

Naluneqanngitsutut upernaq manna inatsisartut ataatsimiinneranni inatsisartuni amerlanerussuteqarluartut Siumut Inuit Ataqatigiillu aaliangiuppaat Tele Post Greenlandimik namminersortunngorsaaneq unitsinneqassasoq.

Inuit Ataqatigiinni tamanna peqataaffigaarput pissutigalugu isumaqaratta upperalugulu namminersortunngorsaaneq kingunerissagaa Nuup avataaniittut attaveqaatit tungaasigut ajornerusumik inissisimalersinneqarnissaat; ineriartornerup unittoortinneqarnissaa, Nuullu avataani kiffartuussinikkut akigitinneqartut qaffakkiartuinnalernissaat, akisunerulernissaat, ajornerulersinneqarnissaallu ernumassutigigatsigu. Tamannalu pinngitsoortikkusukkatsigu.

Telepostip namminersortunngorsarneqarnissaanik unitsitseqataavugut isumaqaratta upperalugulu kalaallit inuiaqatigiit ataatsimoorneqatigut kivitseqatigiinnitsigut akileeqaatigiinnitsigullu sinerissuarmi sumiikkaluaruttaluunniit attaveqaateqarnerup tungaatigut sukku tamatigut naligiinnerusumik atugassaqartinneqalernissarput; sumiikkaluaruttaluunniit ullumikkuminngarniit attaveqaatigut sukkanerullutillu pitsaanerullutillu akikinnerulersinneqassasut.

Taamaattumik paaserusukkiga anguniakkap taassuma anguniarnerani Naalakkersuisut sulimerninni sumut killissimangersut.

Kissaatigaaralu apeqqutima ullut qulit iluanni akineqassasoq.